

AOKA SAMY HARISIKA HANAJA NY ZON' OLOMBELONA

Raha tsy misy ny sampona dia amin' ny Alatsinany ho avy izao no hanatanterahana ilay Fivoriambe Iraisampirenena momba ny Zon' olombelona eto Madagasikara.

Lafin-javatra iray isan' ny nosoritana ho soatoavina amin' izao taon-jato iainantsika izao ny fanajana sy fitandroana toy ny anakandriamaso izany Zon' olombelona izany. Iantsorohan' adidy amin' ny fiarovana azy io ny FANJAKANA, ary ny lalana velona moa dia efa miantoka izany rahateo.

Matetika anefa dia ny Fanjakana no tena fatra-panitsakitsaka ny zon' olombelona

Izay no misarika anay hisintona ny fisainan' ny maro mba samy hanaja sy hiaro ny Zon' olombelona.

Rehefa ny zon' olombelona no resahina dia ny alehan' ny sain' ny any ivelany any voalohany indrindra dia ny fitarafana sy fitiliana ny fomba fitazonana olona am-ponja.

Tsy azo odioan-tsy hita anefa fa amin' ny tany andalam-pandrosopana toa an' i Madagasikara dia mbola mahasaro-piaro ny betsaka kokoa aloha ny fanaraha-maso ny fiarovana ny zon' olombelona eo anivon' ny fahafahany sy ny fahalalahany, ary laharam-pahamehana ho azy aloha io raha ampitahaina amin' izay zava-mitranga any am-ponja.

Ahoana tokoa moa no ndeha hiheverana fa voahaja an-tsakany ary voazaro an-davany ny zon' olombelona any amponja raha toa ka ny zon' olombelona afaka aza tsy misy mpiantoka ?

Matetika no mifanohitra amin' ny lalana velona, mifanipaka amin' ny fanambarana iraisampirenena momba ny zon' olombelona ny zava-mihatra amin' ny olom-pirenena, ka eo no tsy maintsy ifankaherezana sy ifampifehezana mba tsy hisy hihevi-tena ho tsy maty manota ka sanatria halaim-pahany hanao zintona ny zon' ny hafa.

Raha mamaky ny lahatsoratra rehetra amin' ity laharan-gazety ity fotsiny isika dia saika mifamatotra betsaka amin' ny tokony hanajana ny zon' olombelona ny vontoa'ny ny ankamaroan' izy ireo.

Tamin' ny Alarobia teo, ohatra, dia navoakan' ny gazety namana iray mpiseho isanandro ny fandrinariran' ny tompon' andraikitra ny antontan-taratasy tokony hanome alalana an' Ingahy Tantely Andrianarivo nahazo fitsaboan-tena ivelan' ny fonja itanana azy ankehitriny noho ny tsy fahasalamany. Efa tapa-bolana izao no nanaovana ny fangatahana, hoy ny fitateran' io gazety io, nefa hatramin' izao dia voarirarira izany.

Mampitahelo tekoa izany satria tranga iray isehoan' ny tsy fanajana ny zon' olombelona. Tsarovy fa na olona voaheloka ho faty izao aza ka hotifirina amin' ny 5 ora hariva nefa mitaraina ho marary an-doha izy amin' ny iray ora alohan' io. dia tsy maintsy manao izay ala nenina itsaboana azy aloha ny mpitsabo ary tompon' andraikitra amin' izany ny Fanjakana. Midika ho tsy fanajana ny zon' olombelona ny filazana hoe avelao ho faty eo izy io fa efa hotifirina hovooina ihany amin' ny 5 ora.

Koa amin' izao fivoriambe iraisampirenena hatao eto Antananarivo amin' ny Alatsinany izao dia tokony samy ho tonga saina ny malagasy rehetra amin' ny fanapahan-keviny avy ka samy harisika hiaro sy hanaja ny Zon' olombelona. Tsy voatery hamboraka ny zava-misy eto Madagasikara eo anoloan' io Fivoriambe io anefa vao afaka mifampifehy, fa na hisy na tsia io Fivoriamba io dia soatoavina tsy afa-misaraka amin' ny tarigetran' ny Demokrasia sy ny fametrahana Tany Tan-dalana ny fanajana ny Zon' olombelona.

ANDRIAMAROTAFIKA Soava
(Tel. : 032 07 599 56)